

# Christian Meivah



May - June, 2019

Lhani seh thuso

Private Circulation

## Pentecost Lhagao Theng

Pathen chapa Jesu thina chu, koi hileh ama chonset jeh a athi lo chu themchanna dia tahsan jouse Pathen Lhagao apeh, cha-lamthua akisem, Pathen cha hinna hingjouse chu Pathen in avengtup dia vantilte anganse kimu dohna tampi Bible a akisun in, Kitepna Lui le Kitepna Thah mun nia kisimdoh a konin (Gen. 19:12-22, Acts 12:1-19) aki hei:

1. Sodom le Gomorah khoa Lot te vantilin ahuhhing imuve. Hiche kho tenia cheng mi chonsete jouse su mang dia Pathen vantilte Abraham koma ahung un, Abraham taona kon in chonse lou Lot te insung huhhing in aume.

Pathenin chonsete asuh mang nomna ajeh chu, Sodom le Gomorrah a Vantil te analut un, amit tah un michonse ho umdan amudoh tauve. Pathen vantilte gei-a chonset pi dia agot jeng phat un, vantil ten mijong ho chu amit-u achotsah tan ahi.

2. Pathen vantil ten Lot le aheng akom ahuhhing nome. Pathen vantil ten Lot le ainsung mite, chule aheng akom ho ahuhhing nom vang in, achanu teni toh kicheng dia kitep

sa ho gei-a, Pathen Lhagao beiho chu ahuhhing thei pouve. Sodom le Gomorrah dalhaa Lot insung mite ajam doh vangun, Lot jinun vantil te thupéh apalkeh jeh chun, Eve in thina theiga aneh a athilo bangin, lamkima chisong asoh denin anathi jenge. Abram, Lot le ainsung mite, Lot jinu tilou, Pathen Lhagao nei, Pathen sei banga hingho chu vantil ten ahuhhing tauvin ahi.

3. Kitepna Thah a vantil in Peter ahuhdoh gelute. Kitepna Thah lam khanga Pakai Jesu hin tahsan ho Pathen in Lhagao apeh ho, lah a Peter chu Lhagao adimin (Acts 4:8), hijeh a chu hangtah in Pakai Jesu huhhingna thupha aseiphongin chule songkula akhum tauve (Acts 12:5). Peter chu Pathen Lhagao chenna, Pathenin cha lamthua akisem acha ahijeh chun, Pathen chate huhhinga vengtup jing dinga panmun alah tah jeh chun, Pathen sem vantil chu song kula analut in Peter chu ahin puidoh tan ahi. Vantil in Peter agapui dohnaa melchih jing thei thilsoh ni chu ahile, (i) Khopi sung lutna kotkhah chu achamin akihong doh jengin ahi. (ii) Mipi taokhomna muna, Mark nu Mary ahung chun Peter in, kot ahon pehna diuva kot akiu kiu jeng vang

in chule kot hong ding nun Peter ahi tia aseipeh vangun, Peter hung doh theina dia taoho chun, “angol nahi” atiuvin, ipi dia tao ahiu jong akihet pouve. Hitobang chun tulai houbung mite itao vangun tahsan bei-a tao ihi diu tijat aume.

Kitepna Lui leh Kitepna Thah Bible hin, thu achom chom aseipon, Kitepna tenia hin Pathen in asemsa mihem angailutna jeh a, ama Lhagao apeh, anei chan veng tup ding le ahuhhing dingin, vantilte amang jingin, amavang Pathen Lhagao bei, chule Pathen thupéh palkeh ho vang vantil in ahuhhing jou pouvin ahi. Hijeh a chu Pakai Jesu dihtah a tahsana Pathen Lhagaoa hing ihiu leh Pathenin eihuh diuvin vantil asang sang akoi in ahi, tih isuhmil louhel diu ahi. Jesu tahsan hi iti phatchom hitam !

*(Dr. T. Lunkim)*

## Jesu nung juiho

Jesun aseijui te leh ama tahsan ho jouse akingailut diu, insung khat tobanga akigel diu adei-e. Sei jui 12 ho chu Jesu toh akingai lleh un ahi. Jesu tahsan dang ho jong chun Jesu angailuvin chule athuhil ho akichin un ahi. Amaho chu insung khat a chengkhom abang jengui. Hi tia Jesu ngailu ho chu houbung mi ahiuvin, Pathen mite ahiuve. Hijeh chun, houbung chu ana khangtou lleh-e. Amaho vanga tuni gei-a Jesu houbung mi pungjing ahi. Hitobang anahia Pathen mite houbung hi Jesu

2

insungte ahi tauve. Amahon atahsan uchu ahechen un, kikhopna jong ana neijingui.

1. *Taona le kihilna* : Amaho aki khom jingun chule seijui te mihilna chu thanom tah in anangai jingui. Jesu thingpel a akikhet beh a athi phat chun, atahsan hon Messiah iti thi ding ham tin ana lungdong un, amaho jong kimana, kihat mai din kichatna jong ahin nei tauvin ahi. Seijui ho lah a Peter chun tilla anatoh ngamat boljom ding ahintin, ahile mi phabep chun anung ahinjui tauvin ahi. Jesu thu phonjal ding tita louva nga matjoh tah ding atiu ahi. Hiche phat chun Jesun amaho chu ahin kimu piuvin, atahsanu asuhhat peh kit tan ahi.

Ahinga van lama lahtouva aum kon chun, seijui ho henga chun Jerusalem dalha hih un, Lhagao Theng nakipe diu chu ngah jouvin, tin ana seipeh in ahi. Pentecost ni kho chun, hui lentah anungin, meikou mihem lei bangin alengin, seijui ho henga anachun, Lhagao Theng in amaho chu adim tauve. Hiche phat chun, ameisan tapouvin, Jesu thu seiphong ding ana thanom jah tauvin ahi (Acts 2). Tilla atahsan ho kikhop naa mi 120 vel bep kikhom ji chu, Pentecost nikhoa seijui hon pao chom chom atho thei uva, miho chun ama ama paova Jesu thu ana jah thei phat chun, Jesu tahsan akibe lap tauvin ahi (Acts 1:15). Pentecost nikhoa, Lhagao Theng thahat na achan phat chun, Peter chu ahung

kicha tapon, ahang doh tan, mipi ho henga Jesu thu ana seiphong jeng tan ahile Jesu tahsan mi 3000 jenin ahin belap tauve (Acts 2:41). Peter in thu alhangsap jom le khonung in mi 5000 in abelap kit tauve (Acts 4:4). Houbung chu ahung chalin, Judea, Galilee, Samaria, Ethiopia, Antioch ho ahin phatai (Acts 8-11). Chule Jesu tahsan ho chu Antioch a 'Christian' kiti min hin ahung kihe masa penui (Acts 11:26). Jesu tahsan masaho chun taona anaha manl'heh un ahi (Acts 1:15).

2. *Neikhom* : Tahsan masaho ki khopnaa chun gamchom chom mi chule paochom chom miho akikhom un, amaho chu insung khat bangin akigelun, anei ho jouseu anei khom un ahi. Aлах uva Greek pao tho Jew jong atamin, ahinla koiman achombol deh pon ahi. Ajeh chu amaho chu Lhagao Theng in alam kai uva houbung khat a kitoh tah a kipunkhomu anahi. Amaho chu in sung lentah abangui (Acts 2:44). Anei agou joh-doh aumleh asum chu mivaicha migenthei kithopinan amang un, chule asum chu houbung a abonin ape jiuve (Acts 4:33).

Insung khat a hingkhoma kigel uva, pangkhom uva chule kitho khomu ahi (Acts 4:37). Nei le gou neiho chun amaa danin a-it pouvin, Pathen mi ngailutna laa asah seh-u hilouva toh lama jong avet sah-u anahi. Hitia ahin jeh-u chun mi avaicha behseh ana umpouve. Ama

ho houbung chu insung khat ahin, hichu thil kidang tah le hiti dia tahsan theilou tah ahi. Atahsante hi Pathen insung mi ihieve, ti kichen tah a avetsah-u anahi.

3. *Gospel thu hangtah a phon* : Jesu seijui ho chu, Lhagao Theng achan jouvin, kicha louhelin, hang san tah in Gospel asam phong leu vin, chule thil kidang ho jong ana sosah un ahi (Acts 4:31). Mihon anui sat vangun, a-olmo deh pouve (Acts 2:13). Amaho lah a Peter chu ahang san deh set-e (Acts 2:14). Amahon Jesu thodoh thu ase un, Pathen hepi na nasatah in ana changun ahi (Acts 4:33). Tilla ana meisan Peter le John chubanga ahung hansan chu amuhon kidang ana sauve (Acts 4:13). Hijeh chun Pathen thu amachalin, atahsan ho akibe jingun ahi (Acts 6:7).

Seijui ho chun thil kidang tampi ana sosah un, mihon adatmo jeng tauve (Acts 5:12). Ana adam lou ho chu Peter hungna ding lampia ana lupsah jiuvin, Peter ahung teng ale (shadow) achunga achuh teng adamhel jiuve (Acts 8:6-8). Jesu tahsan ho thil kidang bol theina hi tulai in jong aum nalai-e. Jesu songlel poute.

Jesu tahsan kiti hi thil kidang bol theina jong ahi. Doctor in ajo tah lou mi tampi jong, Pathen koma taona akiman peh tengle hung damdoh ho thudol akija doh jinge. Hijeh chun la khat in, 'Lhasam jeng jong leu hen, lha poute' atin ahi. Pa Pathen phatna ho geldoh jing ute.

## Nikho loupi ho

1. Tukuma Nu geldoh kitna nikho (Mother's Day) May 12 ni ahin, nu hing nalai hon, nanu teu kipa thilpeh neileu chun aphai. Nu in acha angailut dan hi, ama sanga acha angailut jep ahin, taopeh angai in, adamsot ahinsot nadiuva bol thei thei bolpeh angai-e. Mi akipa leh ahinkho sao jep dan ahin, alunga setna gel louho khu mi gilou ho sanga hingsot jep in imuvin ahi. Anu ahinlai a jen thei ho mivangpha ahieve. Anu adei banga ana jenman louho chu anun leiset adalhah teng seido luvin alunga kisihna aneitei jin ahi.

2. Tukuma Pentecost nikho hi June 9 ni ahin, Jesun Pathena kona Lhagao Theng mihem ama tahsante pan pi dia ahinsol nikho ahin, kipa pia Pathen thangvah ngai ahi. Atahsan ho Lhagao Thengin aumpia ahile mu (vision) phatah tah amu thei uv in chule thilbol theina thahat in jong amaho chu aum piuv in ahi. Mi khat in Jesu phatea atahsan teng leh Lhagao Theng hin ama chu aumpi jenga lamdih akopeh a, ahahsa jousea akithopia, lungmon le lhamonna nei mi ahisah ji ahi.

3. Tukuma Pa geldohna nikho hi (Father's Day) June 16 ni hi ahin, apa hing nalai jousen, ama deilam thilpeh afeh a vang akiboh sah ngai ahi. Mipa ana umhieh leh cha kiti jong umlou hel ding ahin, apa phat na helouva apa chung a kiphin phin

avang setnau atam jin ahi. Anu apa chu itobangin ama lung toh kitoh hih jongle thip beh a uma ase ngai ngai jeng diu chule ajabol jing diu hi, chate lungput ahile insunga chamna le kipana aumin ahi. Hiche thu hi atahsan lou hon, nanu napa athi jou teng adihna nahin het doh diu, ana gei sang val jeng tading ahi. Mipan ama ding gellouva, acha aji avah ji hi thil kidang, thil thupi tah ahi. Aji acha neh le chah ding gel louva sum amu cheng adei dei a sumang mipa jong themkhat um nante. Amaho hi insung miten mohvet jenga pha ahi. Ahinkhou asot jipoi. Insunga kinah kibao, lunghan, kiti ho hi insung su sea pang ahin, insunga satan hatdoh louna dia lunghan kinah chule apha lou hoa kona kitim hat a, Pathen henga insung chamna le kipana ki thum hat ngai ahi.

## Air Condition thudol

Tulai insung tampin A.C. akichoh jou tauve. Thil jousen phat na leh setna anei in ahi. A.C. jong hi apha louna toh het tha ngai ahi. Mi kimkhat in A.C. hi 20-22 degree hoa akoi in, adap tengle pon lum akisil jiuve. Hitia bol aumle ama chu mun nia mangthai ahi. Ajeh chu mihem tahsa temperature hi 35 degree Celsius vela uma ahi. Mihem tahsa'n athoh jou temperature hi 23-39 degree bou ahi. Hichu 'tahsa thohjou teperature' tin akihei (human body temperature tolerance). Indan sung (room) temperature chu

tahsa thohjouna khokala, nemjep ahiloule saangjep a aum teng, tahsa in thohlelna anei chu chit ham, ahi loule khosih jeh a kithin ham in ahin vet sah jie. Na A.C. chu degree 19-21 indan sunga nahisah a ahile mi hem thohjouna noilam ahin, hiche teng chule hypothernia nat in nahin lo'n natahsa a nathisan chedan aki suh mo jin, tipum mun phabep a thi san hi alhung duhdah jouji tapoi. Hi tia chu tahsa akikoi sot a ahitengle arthritis nat le adang hon mihem chu ahinlo jie.

A.C. akiha manna ahile mi hem ulsa asohji tapon, ulsa alondoh lou jeh chun tahsa sunga toxin hi jong achedoh tapon, hijeh chun mi chu B.P., skin allergy, itching kiti hon ahinlo jitai. Chukitle A.C. hitia degree nemchaa akikoi tengleh ama compressor chun taanglouvvin na ahatoh jin, A.C. 5-Star hijong leh, Electric ahaneh jin, electric bill jong atamjep jitan, chule compressor jong chu asebai jep jitai.

Ahileh A.C. hi anem pen na ijat a koi ngai hitam ? A.C. anem penna degree 25 a koi ngai ahi jie. Sum jong heh lou, A.C. jong lhou, chule damna jong hi ahi. Iti asat tengle adap loina dia 25 noilama koi loi sanga 25 a koi a ol-ola dapsah joh apha. Mi loi khat in A.C. athoh thei poi. Amaho chu A.C. a kona akichih thei-u angai-e. Idam mona dia idia kithoh thoh ding ham ? Hiti ahi jeh a hi ima jousen apha le ase anei het them ngaima ma ahi.

### **Baptist John** (John the Baptist)

27 A.D. kichailam ahiloule 28 A.D. kipat lam chun, Pathen mipa khat in Jericho a kona naicha a um Jordan Phaicham a neldi gama chun mipi tamtah akikhoppi jin ahi. Ama hi John tin akihei. Vana kona kouna chang khat ahin, aman sadhu khat hinkho anamangin ahi. Ahinla sadhu dang banga gamthip a um louvin, miho anga Pathen thu ana lhangsam len ahi. Aminche lleh in, Jordan Phaicham seh hita louvin, Judea gama jong mihon ahin he tauve. Ama thusei ngai din Jerusalem leh mun dang danga konin mi anache jing tai. Athusei chu angai ho din het abai in, miho khat le khat in ama thusei doh ho chu kihounan anei tauve.

1. *Ipi thu asei* : Pathen lenggam ahung nailheh tai (Mt.3:2) tin ana sei-e. Miho chun itihle ahita dem, tin angah panji tauve. Miho koma hiche nikhoa ding chun kiging jinga aumna diu ahilin, chule anikho tenga achung thu-u akiphon tengle them achanna diuva akiginna diuvin ana hilun ahi. Ahindanu akheluva, Pathen lunglhaina aholna diu ana hasei in ahi. Twi lonna koma ana cheng in, mi alungkhel khat aumleh ama chu Baptise abol jin ahi. Hijeh chun ama hi Baptise bolpa tin akihei (John the Baptist). Mivaicha migenthei kithopi ding thu jong asei in, chule mipi in ahenga, "Ipi kabol diu hitam ?" tia adoh ule, "Sangkhol chol ni neiy aneilou hop hen, chule anneh neiy an

jong chutima chun bol hen" ati (Lk. 3:10-11).

2. *Ahansan dan* : John in miho chu hou lama asuh theng uva, adih lama hinkho amanna diu ahasei in, koi tobang lunghei aumle Baptise abol jin ahi. Pharisee ho leh danthu sun hon Mose Danthu alhing set aume, tin ama thusei chu adonji pou vin ahile phat khat chun John in ama ho chu, "Vo gulse son ho, khonunga hung lhung ding Pathen lungsat naa kona jamdoh dia thu namop-u koi pen ham ? Nalung khelu nato ga'n phong doh un, ... nalung khelu photchetna twi a Baptise kachan sah nahiuvvin, kei bana hungpa vang khu, keisanga gam chenga chung nung jo ahin, keihi akengchot teni sut dinga kilom jong kahipoi" tin ana sei-e (Mt. 3:7-9).

Hitia mi ahila thu alhangsap jeh in, Jordan Phaicham vel chu asuling soh tan, Judea leh Perea gam vaipote alungboi tauvin ahi. Tila munthip tia anahet-u gam chu mi achele avahle ahung tamin, gam lam kai ho chun alonaje ahe pouvin, hiche John hi hoilang mi ham, koi langa kai natong ham, van leng gam ati hi ipi aseina ham, miho atil set a lamkaite chung a kiphin sah ding agot ham, tiho akidong to tauvin ahi.

3. *Kanunga hung dingpa* : John in kei bana hung dingpa hi kei sanga gamchenga lenjo, chungnung jo ahi, tia asei jong hi gam vaipote lungboi na ahi doh tai. Alungu akisuh theng uva, lenggam hung dingpa chu alem na diuva mipi chu anahil ahin, koipen

6 hung ding ham, ti jong ahenom uve. Ahung dingpa chun miho chu Lha gao Thenga Baptise achan sah ding jong ana sei in ahi (Mt.3:11-12). Jerusalem a hou kiloikhom achom chom ho chun, amaho thempu ho leh Levi ho chu John thusei ipi mong ahi phochen din akikhop nauva ana solun ahi. Amahon John chu thudoh chom chom jong ana dong tauve. John in, kei Christa chu kahipoi, ati leh, koiba nahim, tin adong tauve, Chuin John in, "Keihi gam thip a khosam ogin khat in Pakai lampi sem jangun, ati tia Isaiah themgao in aseipeh chu kahi" ati (Jn. 1:19-27).

Hitia hon chom chomin mi ahilna ho hin gam vaipo, hou lamkai ho asuboi pon, angaina danin ana ngaito uve. John thusei dan chu ama ho lahdan in, Jordan Phaicham a thu lhangsam Essence kiti loi ho sei dan toh kitoh in alauvin, donin jong asepe pouve. Ahinla John min aki thang cheh cheh jengin, Galilee a khang thah phabep jong John nung jui in ahung pang tauve. Amaho lah a Simon Peter, Andrew, Philip, Nathaniel ho hi minphah thei ahi. Baptist John in asei jui ho chu tao ding dan jong anahile (Luke 11:1).

4. *Jesu Baptise chan* : Nikhat chun Galilee mi khat John koma ahunge. Ama chu Nazareth khomi Jesu chu ahi. Ama hi mihon ahenai pouve. Ama hin John khut a Baptise chan ding ati ahin, ahinla John chun koi ahi ahen, ana chansah ngam ta poi. Ahinla Jesu chun John khut a

Baptise chan tei anagoi. John in, kei joh hi nangma khut a Baptise chang dia lom kahin, kei koma nang iti Baptuse nachan ding hitam, anati tan ahi (Mt.3:14-17). Ahinla John in Jesu chu Baptise achan sah tai.

5. *John akimat* : Jordan phaicham ni-in akihomin, leng nin vai anapoi. Jordan vadung chu leng teni gamgi anahi. Vadung chu akipalla ahile Herod Antipas vaipohna gam ahi. Hiche lengpa hin, asopi pa khat jinu Herodias kitinu chu ana lah a aki chenpi anahi. Hiche thu hi John in aseidoh jeh a Antipas in John chu avet daa amat ahin, songkula akhum tai. Hiche nikhoa konin Jesu le John akimuto kha tapoi. Galilee a Pathen thu seiphonga pang John akimat phat chun, Jesun Galilee a hunga Pathen thu lhangsapna kin ana lah ahi. Tila chu John aum jeh a Jesu munchoma ana um ahijoi(Lk.3:19-20). Lengpa jinei duhdah lou chu John in dan toh akitoh poi, tia lengpa anapho jeh chun, lengpan amat loa chule alol kitana kithat anahi (Mt. 14:1-12).

### **Tonsot hinna lampi**

Thi jouva Damun a che sangin Tonsot Hinna mun joh akidei cheh in ahi. John 3:16 in alampii hiti hin eihilui, “Pathenin hibanga hi van noi angailut ahin, koi hijongle atah san chan chu mangthah louva Tonsot Hinna anei theina din achapa changkhat chu apetai” ati. Tahsan jeh a thikit louna hinkho nei ding thu

kisei-a ahi. Bible seidan ahile, atah san chan chu hing ding, tih ahi. Hitin jong akisune, “Tahsan bei-a Pathen lung tohoi ahipoi” (Heb. 11: 6). Atahsan chu themmo chang ponte, tin jong akisune (Mk.16:16). Ahinla tuni Bible chang hin, mi Jesu tahsan jouse huhhinga um ding ahi vang ati poi. Ahiloule huhhinga umna dia mi hemin ipi pi abol ngai ham, ti jong aseipoi.

Judas Iscariot chu Jesu tahsan lah a khat ahi. Ahinla van gam lona din athipoi. Hou lamkai phabep in jong Jesu anatahsan ui, ahinla amaho chu Pharisee ho nungjuhi ahiuvin, tahsan phonna (confess) abol pouvin, amang thai tauve (Jn. 12:42). Agrippa in jong atahsan in, christian khat ahi dehchet in, Jesu akisan deh poi. Akhang akhang in Jesu tahsan mi tamtah in Jesu sei angai pon, amang thai tauve. Chapa Jesu sei ngai a jui lou mi chun hinna aneilou ding Pathen lunghanna joh achunga lhung ding ahi (Jn.3:36).

Pentecost nikho chun Jesu thu Peter in aseiphong jeh chun, mihon Peter henga, ipi kabol diu hitam, tin ana dongui (Acts 2:37). Chuin Peter in ajah uva, “Nachon set lung hei un lang, khat cheh in nachonset-u ngaidamna dingin Jesu Christia minin Baptise chang cheh uvin, chuteng Lhagao Theng thilpeh hi nachan diu ahi” anati peh tan ahi (Acts 2:38). Hia kihilna hi ajui lou jouse chun Jesu katahsane tijong

leh akisei hi ajui louva ahile achonset in atha thou thou ding ahi. Abanin, Tarsus a um Saul kitipa in Damacus lampia Jesu akimupi jou chun, Jesu phate chan anatah san tai. Pathenin Saul toh ding seipeh din Ananias chu Damacus a ana sol tai (Acts 9:5-7). Pathen thu ngai a jui ho Pathen in Tonsot Hinna apei.

Noah in idia kong khat ana sem ham ? Kong sunga lut chan sochatna ding ahi. Noah in tahsan jalin Pathen thu angai in ajui in ahi (Heb.11:7). Noah chun kum 100 vel kong anasemin, Pathenin lungde hattah in asem chai chu ana ngah in, hiche kah chun michonse ho chungama setna anabol pon ahi (1 Pet.3:20). Hiti chun Noah khang lai chun, kong chu sochatna kong ahi. Kong a lut lou sese chu athigamun, kong sunga lut ho chu sohcha ahiuve.

Konga lut lou ho athiu chu Pathen ingoh diu ham ? Konga lut le alut lou ho chun tila chu sochat theina ding phatpha amu cheh-u anahi. Athiho jong chun sochatna kong akisem mannu ahi. Konga alut lounau ajeh chu amaho kilhen ahi. Ajeh chu Pathen seiho ngai sanga, chonset hinkho manding akilhen jeh-u ahi. Pathen atahsan lou jeh uva konga lutlou ahi tauve. Noah chun konga alut masangin Pathen ana tahsanin, ahinla kong sunga alut jou a bou sohcha (huhhing) ahi. Atahsanpa khat ahi vanga, Noah chu konga alut masanga sohcha loulai a

ahi. Atahsan vanga kong alut jouva sohcha ahi. Sochatna kong chu ni khat kaltou ding ahin, akaltou ma sanga kong sunga lut ho chu sohcha diu ahi. Ajeh chu Jesun kong chu atola Ararat mol chungu, twilet ki chai gei-a akoi ding ahin, hijeh chun Noah insung mite huhhing ahang tauve. Jesu katahsane, tiseh hilouva Jesua lut ding, Jesu sei ngai ding ahi. Jesu tahsan jouva pul-lha mi atame. Hiho lah-a chu panlouna dia hinkho kisuh tup ngai ahi.

### **Baptise changlou pa**

Lk.23:39-43 sunga Jesu Calvary mol chungu cross a akikhai chun avela pasal ni jong akikhai-e, tin akisune. Amani hi mi gucha ahi. Amani lah a chun mi khat chu Jesu seiphath chang ahi. Hijeh hin tulai mi themkhat in huhhinga umna dia hin Baptist chan khoh khoh angaipoi, cross a mi lungheipa jong Baptise ahang poi, tin aseijiuve. Akitahsan poule akichai-e, tin aseiuve. Nang in iti nagel em ?

Hia hin melchih thei thil li aume. Khatna, migucha pa chu Mose danthu noi-a hing ahin, hiche Mose danthu hi Jesu thi gei-a ki mang nalai ahi (Col.2:14). Anina a, Jesu cross a akikhai pet gei-a hi Jesun koima henga, apa acha chule lhagao theng mina Baptise achan dia ana kisei doh loulai ahi, nikho 43 jouva bou kisei pan ahi. Athumna a, migucha pa chu Christa lenggam mi hilou lai ahi. Nikho 50 joule bou

hiche lenggam chu kipan ahi. Alina a, migucha pa henga chu leiset chung a Christa in” Chonset ngaidam na tha” anei-e ti kivet sahna ahi (Mt. 9:6), tulai hin vang Jesu leiset a aum tapoi. Jesun mi guchapa henga chenkhompi dia kitepna anei jou ni 43 jouvin, Pakai Jesun seijui ho henga, “Vannoi gam tina cheuvin, kipana thupha gasei phong un, atah sana Baptise chang jouse huhhinga um ding, atahsan lou vang chu them mo changa kikoi ding ahi” tin ana sei-e (Mk. 16:15-16).

Hiche thupeh hi migucha thingpela kikhaipa khang a chu ana kipe loulai ahi. Ahinla thupeh kipeh jouva hing eiho vang hiche thupeh hin eiphah tah jeh un, ikitel doh jou pouve. Hijeh chun, Baptise chan ding thu kisei doh masanga ho hopna din Jesun, “Atahsan lou vang chu themmo changa kikoi ding ahi” tin ana sei-e (Mk. 16:16). John 3:18 in jong. “Atahsan lou vang chu, Pathen chapa changkhat mina, atahsan lou jeh-a themmo kichan sah ahitai” tin akisune.

Jesu thupeh jouva hing hon Baptise chan ding hi adei louva ahileh amaho chu “Atahsan lou” toh kikit a kila ding themmo chang ding ahi (Jn.3:18). Pathen lekhabu thu seidoh ho hi akikala lah lou ding ahi. Ihet them loujeh a, kikal tobanga imu jiu joh ahibouve. Solchah lekha bua Jesu tahsan ho jouse Baptise achang un ahi. Christa a hinom jouse chu Baptise achan ngai ahi (Rom.6:3).

## Insung damna

1. *Deidep* (Lizard) : Deidep hi insunga mun tinna um abang jie. Theida umtah ahi. Dukan a amaho thana ding lou akijoh in, ahinla hiche lou ho hi chemical atam yao jie. Tu lai hin chemical a kona kichih thei angai-e. Tahsa dammona ahi. Hiche ganhing hin atheida, anam ajahnom lou thilho insunga akikoi a ahileh alut nomji tapouve. Ahtui hoh (egg shell) nam hi ajanom pouve. Ahoh hi meh goi goi-a thethang thei ahi.

*Changnam kang* (Garlic) nam jong athei nom pouve. Chang nam kang hi mehgoi goi-a amaho umnomna muna thethei ahi. Ponlou tia kihe English a ‘Napthalene’ kiti jong hi dukana choh thei ahi. Hiche nam jong ajanom pouve. Sum leuna louva deidep suhmang ding itileh mengcha kiva ding ahi. Mengcha’n jucha, deidep ho that jin ahi. Chule deidep hi itha noma ahile ama chu twi adap a dap thekhum a chule tha thei ahi. Twi vot ithe khuma ahile akonden jin, hiche phat a chu tha thei ahi.

2. *Khaolao* (cocroach) : Khaolao hi insung suboh tah ahi. Insung a thei ga, mot neh dia kikoi ho ana nejie. Khaolao hi thi hahtah ganhing khat jong ahin, mohthi thilou ahi. Athana ding hi dukana lou akijoh in, hichu aumna thei thei uva ikap khumleh apha. Ahinla athina ding lou hi, eima neh le chah chung a kap louvin apha. Dammona thei lou ahi.

## Nui-hi, damna (Prov.17:22)

\* Pastor mini hin, suti akilah lhon in Hawaii gam vedin anache lhone. Hou lamkai hina von ho akoi ching lhon in, kholche mini kivonna ho in akivon lhonin, twikhang len pama neldi chung a nilum oidin jingkal khat anatou lhonin ahile nungah kistem hoi tah le sangkhol singtet khat akom lhona ahungin, “Good morning pastor, good morning pastor” atin atoi mang tai. Amani chun, iti dana hiche gam mihon eina het lhon hitam, tin alung dong lhone.

Ajing jingkal in jong vapama chun nilum oidin anatou lhonin ahile nungah asangkhol pahthet khat in ahin hopa lhonin, “Good morning pastor, good morning pastor” ahin tin ache pai pai tai. Amani lah-a khatpa chun adelin, “Iti dana keini hou lamkai kahi nangin nahet doh ham?” tin ana dongin ahile amanun, “Neihet lhon lou hitaimo, kum seh a ikikhop nau muna, ‘Sister Angela’ neiti nu-u chu kahi” anatin ahi.

\* *Ojapu khat in student henga* : Newspaper leh Radio kibah louna ipi ham, tia adoh leh student chun, “Newspaper a Puri kichun thei ahin, Radio a akichun thei poi” ati.

\* Tulai khang hi, akikhang tou lheh tan hijeh chun :

- Phone ... Wireless
- Cooking ... Fireless
- Car ... Keyless
- Food ... Fatless

- Gari Tyre ... Tubeless
- Dress ... Sleeveless
- Leader ... Shameless
- Relationship ... Meaningless
- Attitude ... Careless
- Wife ... Fearless
- Feeling ... Heartless
- Education ... Valueless

Imajouse LESS ahin, ahinla eiho Jesua ikinep nau HOPE hi ... ENDLESS ahi.

\* Lenna chung a tou numei khat hin lenna a atou teng akichat jeh in a Bible asim jin ahi. Nikhat akoma toupan, ‘Na Bible a kisun jouse chu natah san em?’ tin ana dongin ahile, aman, ‘Katahsane, Bible thusei ahi’ tin adonbut tai. Chuin pasalpa chun, ahile ngalen khat in avallut pa chu nahet em?’ atile aman, ‘Oh, Jonah chu, ngapi oisunga ni thum le jan thum um ahi’ anati.

Pasalpa chun, ‘Ipi aneh a, ipi adona ni chujat chu hinga ham, nahet thei em?’ tin adongin ahile amanun, ‘kahepoi. Van gam kalhun teng le amapa chu kadoh ding hitante’ atin ahileh atou khompipa chun, ‘Jonah chu van gama ana um tahih leh iti ding hita?’ tin adong kit in ahile nupinu chun, ‘Achutia ahileh nang in Damuna nanadoh ding hitante’ tin adonbut pai jeng tan ahi.

\* *Chapang khat koma, upapun* : “Nangho ina hi mi loup milen peng kham?” tia adoh leh chapang pan, “Hepu, chapang ngen apenge” ati.

**Het-a phachom ho**

- \* Mi khat in, ken lekha jem lah-a ‘J’ jem hi kalungset-e, ajeh chu :  
- Jesu kiti mi khat min ahi.
- Apenna insung apa min Joseph ahi.
- Ama chu Judah phung mi ahi.
- Judea kiti gama kon ahi.
- John kiti pan Baptise anabol-e.
- Atwilutna vadung min Jordan ahi.
- Jerusalem gamsung ahi.

Nangin hiche jem hi nalungset lou ham ?

\* Mahatma Gandhi chu *Nobel Peace Prize* muthei dia amin ngavei ana pehlut vangun ana kilheng deh pon ahi. Amin apehnau kum ho chu 1937, 1938, 1939, 1947, chule atha nau January, 1948 masang jep toh ahi.

\* Guwahati khopia Two Wheeler Taxi alhai pantai. Amin hi ‘Rapido’ akiti. Numei atola pang masapen nu mi chu, Pinky Malakar ahi. Tuhin hitobang Taxi 1200 vel aumtai.

\* Scientist hon semthu numei naobu asem doh tauve (artificial womb). Hichea ahung pachan mong mong uva ahi teng, numei naobu neilou ham, phalou ham, naobu kiladoh ham ho khela hiche hi manchah a cha neisah thei hitante.

\* Tulai hin, numei alen aneo ho joh doh dia jol-lha, kichenpi dia jol-lha, migama natoh pha tolop tamsanna aume tia pui a lhem atamin, iki chih thei-u angai-e. Tu naicha chun nupi khat tolop sang somni le ni lha khat

a asan din Kolkata a apui un, hikom alhun phat in, michom koma lakh ni in amanu chu akijoh doh un, chule akichoh ho chun amanu nom louvin operation abol angai-e, tin, abol sah un, chule Bangalore a ana kidalhan ahi. Amanu kal (kidney) joh dia ki-at doh hita ding ham, ginmo ahi. Tun amanu hi a-oi aki-atna nung amuvin, amanu jong asunglam ana matchet in ahi, ti thu akijai.

\* Tulai hin semthu churup, Electronic Nicotine Delivery Systems (ENDS) tin Doctor hon aminsah un, chule amin hi ‘E-cigarettee’ tin jong akihei. Dukan a amin hi, ‘e-cigs’ ‘vapes’ ‘e-hookah’ ‘vape pens’ ti hon akimin sah in, churup chep khela chep dia kijoh ahi.

India a state 24 a kon, Doctor sang khat valin, Prime Minister pa henga, mi tampi adammo masanga hiche churup hi akikhana din ahetsah tai. Ajeh chu Doctor ho seidan ahile hiche churup a hin jong Nicotine aum thouve, tihi ahi.

\* *Vahui* (Hornbill -- Anu in atui athah ding tengle thing hom khat sunga alut in akisel jie. Achal chun thing ahom chu ahubit jin, aneh ding pehlutna kham them khat ahomden sah jin ahi. Achate ahung letdom phat in anu chu ahung potdoh jin, anupa lhonin chapang ho chu neh ding athah ji lhone. Vahui alen ahoi pen hi Kerala gama akimui. Kuki ten vahui thusim ngeitah tah tampi inei un, chapang ho akihil jie.

*Christian Meivah* - sim te taona akiman peh jinge. Sumto kuma Rs. 100/- ahin, asim nom hon hin peuvin, sum napeh lhaa kona kum nakisim peh ahi. M.O. hin thot hon Editor kipe ding lekha beh a namin le address suntei un. Editor pu Mobile No.94355-51080 ah hin hetsah un. Manipur le Naga land a sumto peh na thei ho :-

- 1) Ms. Lhingjanem Haokip, KBC
- 2) Mr. J. Manchong (Lunpu), KCC
- 3) Rev. Lhoukholal, Kangpokpi Missn
- 4) Mrs. Veikholam, Ideal school, cipur.
- 5) Mr. Henkai Lenthang, Medziphema,
- 6) Mr. Seikholun Singsit, Kohima.
- 7) Mr. Kapcha Singsit, Dimapur.
- 8) Mr. Hegin Lhungdim, Mizoram

**Het-a phachom ho**

\* Cricket kichep patna mun hi England ahi ... Asia sunga country aneo pen hi Maldives ahi ... Mihem lungchang souphut hi minit khat a 72 ahile Normal ahi akiti. ... India a Lok Sabha a Speaker masa pen, G.V. Mavalankar ahi.

\* Mi athisan kinai behseh ho aki chen leh achate adammo nome. Acha apen jouva damsot lou, hingsot lou, thisan nat jat chom chom vei, lymphocytic, vision disorder, leukemia, birth defects etc. ho anei thei ahi. Adeh a *cousin* ho kichen lou apha ... Numei in nao avop lai a twi ahadon angai-e. Nipi lai ahile ahadon cheh angai in ahi.

*Editor :*  
Rev. M. Haokhothong,  
C/o, T. Manchong  
Nichols Higher Secondary School, Satibari,  
P. O. Rehahari -781008, Guwahati, Assam.

*Christian Meivah*  
May - June, 2019

PRINTED MATTER

To :